

Inatsisartunut isummerfigisassatut siunnersuut, Naalackersuisut peqquneqassasut malittarisassanik pilersitseqqullugit, inuussutissarsiutinut ilinniarfinni ingerlariaqqiffinnilu ilinniartunut periarfissaalissasoq misilitseqqinnissaq karakterit qaffassarnissaat siunertaralugu.
(Siunnersuuteqartoq: Nivi Olsen, Demokraatit)

Siullermik Demokraatineersup Nivi Olsenip inuussutissarsiutinut ilinniarfinni soraarummeernermi angusisimagaluarluni angusarlussimagaanni soraarummeeqqissinnaanermik Naalackersuisut malittarisassanik pilersitsinissaannik siunnersuutaanut Siumumiit qujavugut.

Siumuminngaanniit Nunatsinni ilinniartitaaneq assorujussuaq inerisaaffigerusupparput. Ukiuni arlaqalersuni ilisimatuussutsikkut aallaaveqanngitsunik, tunngavimmigut amigarpasissinnaasartunik tigusilaaginnarfiusartunillu aalajangiisarsimanerup kingunerisai maannamut misigileqqagivut isumaqarpugut. Ajortuinnaangillat, kisianni meeqqat atuarfiat ingerlariaqqiffiillu pitsaassusaat ullumikkut suli appaseqaat, naak ilinniagallit amerlaneruleraluartut suli suliaasaqasugut Siumumiit isumaqarpugut.

Ilinniarfeqarfinnik aallussineq pimoorussinerlu immi ajunngilaq. Ilinniarfeqarfinnillu suliaqarniarnermi eqqummaariffigisassat annertoorujussuupput. Oqilisaaniaannarluni oqilisaaniarneq imaluunniit ajornasaartitsiniaannarluni ajornasaartitsineq eqqarsaatigilluakkameersuusariaqarput, ilisimatussutsikkullu tunngaveqartussaallutik, taamaanngippammi ilinniartitaaneq pitsaaneq qanillattoruminaassaqqimmat.

Ilinniarnertuunngorniarfinnut ilinnialersinnaanerup ajornannginnerulernikuunera ilaatigut meeqqat atuarfiinut ersiuteqartarput, ilaatigummi siumugassaasarmata ilinniartitsisut ingerlariaqqiffiup oqimaatsortai kivissammagit meeqqat atuarfiinit iliuuseqarpiartannginneq. Aammalu kikkut tamangjarluinnarmik ilinniarnertuunngorniarinnaanerup apeqqusernarsinikuulluni. Ilami meeqqat siunissagissaassappata meeqqat atuarfiata kivitassarisaa annertunerujussuugaluarpoq. Ingerlariaqqiffiit ilinniartitsisunit naatsorsuuteqaannartarlersimanerat ukkatarinerusariaqarparput, soormita taamak ilersimasoq? Uagut Siumumiit isumaqarpugut tamanna meeqqat atuarfiini ilinniartitsisunit sakkussaaleqinermi, iliuusissaaleqinermi saaffissaaleqilertarnermiillu aallaaveqartoq, immaqalu aamma Ilinniarfissuaq suli immikkut qiviarnerusariaqaripput. Kisiannili ilinniartitaaneq tamaat ataqtigiissutut nakkuttariaqartoq. Nunattaana suna pisariaqartikkaa? Imatuunngitsoq inuit ataasiakkaannguit suunuku pisariaqartikkaat?

Inuussutissarsiutigalugu ilinniarfeqarfinni ilinnialersimagaanni ilinniartumut piumasaaqateqarpoq, ilinniarfiit allaammi meeqqat atuarfii aamma soraarummeernermi piumasaaqateqarput. Soraarummeerneq immikkut qulequttatut isigissagaanni imaannaangilaq. Kikkummi arlaqaqisut immikkut isumaqarrapput. Soraarummeernerullu oqaluttuassartaa qiviaraanni avungarujussuaq pissuugut, tassanngaanniillu inerisarneqarsimanera aamma oqaluttuassartaqarluni. Soraarummeernerup siunertarisaali allanngunngilaq, tassa ilinniartup soraarummeernermini takutissavaa ilikkakkamigut sumut killissimanerluni. Tassanilu ilinniartitsisoq pingaaruteqarluinnarpoq, pikkorinnera, tiguaasinnaanera, disciplineqartitsisinnaanera, sinaakkusiillaqqinnera, silassorinnera, ilinniartunik unammillersinnaanera il.il. Ilinniarfinnimi inuttut piginnaasat assigiinngitsorpassuit ilinniartitsisup tunniuttarpai, ilinniarfeqarfiullu.

Soraarummeernermi angusarissaarniaraanni ilinniartoq sukataartariaqarpoq, sualuppoq siunissani ilinniaqqinnissamik ingerlariaqqiffigisassamik takorloorsimaguniuk.

Ilinniarnermi suna pingaarnersaava? Ilinniarfeqarfinni sumiluunniit sammisamut ineriartornissaq pingaarnarpaasarpoq aammalu misilitsiffiusuni sakkussaqarlualersimanissaq.

Siumumiilli isumaqarpugut soraarummeernermi kalaallinut atugassarititaasut immikkut ukkanneqartariaqaleqqasut, siunnersuuteqaraluarpuummi itigartitaasoq, tassa oqaatsitsinnik soraarummeersinnaanissaq kikkunnut tamanut ammaanneqassasoq. Ilisimatusarfik nutserisumik atorfinitsitsinikooreerpoq, sooq taava sinnerinut atuutissanngila?

Naalackersuisut tunngavilersuutiminni ersersippaat soraarummeeqqissinnaaneq pissusissamisuunngitsoq, aammalu ilinniartumut pimoorussinnginnermik kinguneqassasoq ilinniarfimmullu annertuumik qaavatigut suliakkiutaassaqisoq.

Taamaammat Siumumiit pingaartinnerullugu ilinniarfeqarfinni ilinniartitsisarneq soraarummeertarnerullu pitsanngorsarneqarnissaat, siunnersuut ilusimitut isikkoqartillugu itigartipparput, taamatuttaarlu Naalackersuisut allannguutissatut siunnersuutaat aamma itigartillugu.

Najaaraq Møller
Siumut